



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 3475 vum 15. Januar 2026 vum honorabelen Deputéierten Här Sven Clement.

1. Kann d'Madame Ministesch präziséieren, op wéi enger konkreter Bestëmmung am Code de la sécurité sociale den Ausschloss vun der Prise en charge vun enger Allgemengnästhesie berout, wann dës medezinesch onverzichtbar ass, fir en diagnosteschen Akt, dee soss vun der Krankekeess iwweholl gëtt, effektiv duerchzuführen?

Am Code vun der sozialer Sécherheet selwer gëtt et keng Bestëmmung déi virgesäit datt verschidde spezifesche Akten net kennen en Charge geholl ginn. D'Akten di kennen en Charge geholl gi sinn iwweh eng Nomenclature definéiert an d'Konditiounen vun der Prise en Charge kënnen iwweh d'Statute vun der Gesondheetskeess präziséiert ginn.

Fir déi ugeschwate Prise en Charge, schwätzt den Artikel 12, Alinea 1 vun der d'Nomenclature vun den Doktere¹ vun « *actes d'anesthésie accompagnant une intervention, réalisés conformément au présent article, [qui] sont des actes techniques réservés au médecin spécialiste en anesthésie-réanimation et concernent (...).* »

Wéi aus der Äntwert op d'Fro 1 vun der parlamentarescher Fro n° 3219 ervir geet, ass eng IRM een "Acte de diagnostic" a net eng Interventioun. Dowéinst ass d'finanziell Prise en Charge vun enger Vollnarkose bei enger IRM net méiglech.

2. Ass d'Madame Ministesch der Meenung, datt no de Prinzipie vum Code de la sécurité sociale eng Leeschtung, déi medezinesch néideg ass, fir e rembourséierbare Soins kënnen auszuführen, juristesch vum Haaptakt getrennt an automatesch vun der Prise en charge ausgeschloss ka ginn, och wann den Akt ouni dës Leeschtung materiell net durchgeführt ass?

Am Kader vun den IRM-Examen geet den "medezineschen" Akt selwer d.h. d'IRM vun der Krankeversécherung en Charge geholl. Wëll, wéi virdu bemierkt, d'IRM-Ënnersichungen net als eng Interventioun consideréiert geet, sinn d'Käschte vun der Vollnarkose gegebenenfalls zu Laaschte vum Patient.

3. Hält d'Madame Ministesch et fir konform mat de Grondsätz, déi sech aus dem Code de la sécurité sociale erginn, datt engem Versécherter den effektiven Zougang zu enger medezinesch indizierter IRM verweigert gëtt, ouni individuell Evaluatioun vun der Néidegkeet vun der Anästhesie, an eleng opgrond vum Feele vun enger explizitter Tarifikioun an der Nomenklatur?

Keen Assurée krit den effektiven Zougang zu enger medezinesch indizierter IRM-Ënnersichung an/oder d'Vollnarkose verweigert. Wëll d'Reegelen an der Nomenclature vun den Dokteren ze respektéiere sinn, ass eng Prise en Charge vun de Käschte vun der Vollnarkose duerch d'Lëtzebuerger Krankeversécherung bei enger IRM net méiglech.

Et sief drop higewisen, dass Diskussiounen tëscht der CNS an de Representant'e vun der Association des médecins et médecins-dentistes (AMMD) amgaang si fir d'Nomenclature vun den Anästhesisten ze

¹ Règlement grand-ducal modifié du 21 décembre 1998 arrêtant la nomenclature des actes et services des médecins pris en charge par l'assurance maladie.



iwwerschaffen. Dës Revisioun gesäit vir, dass d'Anästhesie bei diagnosteschen Ënnersichunge wéi d'Bildgebung en Charge geholl kéint ginn.

4. Wéi eng konkret Léisunge gesäit d'Madame Ministesch fir Patienten, déi bei der CNS verséichert sinn an déi aus unerkannte medezinesche Grënn – notamment schwéier Klaustrophobie, neurologesch Pathologien, schwéier Angschtstéierungen, morbid Iwwergewicht oder Onméiglechkeet zur Immobilitéit – objektiv net an der Laq sinn, eng IRM ouni Allgemenganästhesie ze toleréieren?

Wéi an der Äntwert op d'Fro 3 ze liesen ass, sinn Ännerunge vun der Nomenclature vun den Anästhesisten am gaangen ausgeschafft ze ginn.

5. Hält d'Madame Ministesch et fir vereenbar mam Prinzip vum gläichen Zougang zur Gesondheetsversuergung, datt dës Patienten de facto gezwonge sinn, entweder op d'Ënnersichung ze verzichten oder eng medezinesch néideg Anästhesie aus eegener Täsch ze bezuelen, während aner Verséichert mat derselwechter diagnostescher Indikatioun eng voll Prise en charge kréien?

Eng IRM-Ënnersichung fir déi viséiert Patienten ass, ewéi an der Äntwert op d'Fro 3 beschriwwen, net ausgeschloss. D'Lëtzebuurger Krankeverséicherung baséiert sech bei der Prise en Charge vu medezineschen Akten a Leeschtungen op d'Nomenclature vun den Dokteren. Am Kader vun der zukünfteger Refonte vun der Nomenclature vun den Anästhesisten ass d'Prise en Charge vun der Anästhesie am Kader vun enger IRM am gaangen diskutéiert ze ginn.

6. Bestätegt d'Madame Ministesch, datt d'Feelen oder d'Onzoulänglechkeet vun enger Bestëmmung an der Nomenklatur vun de medezineschen Akten a Servicer et rechtlech rechtfäerdege kann, datt e Patient, dee bei der CNS verséichert ass, d'Käschte vun enger medezinesch onverzichtbarer Leeschtung selwer droe muss, fir iwwerhaupt Zougang zu engem néidegen diagnostesche Soins ze kréien?

Wéi aus der Äntwert op d'Fro 3 ervirgeet ass ze beuechten, dass, am Kader vun den Akten a Leeschtungen déi vun der Lëtzebuurger Krankeverséicherung rembourséiert ginn, d'Konditiounen an d'Modalitéite fir e Remboursement musse respektéiert ginn. D'Anhale vun den aktuelle Reegele vun der Nomenclature bréngt mat sech, dass d'Käschte vun enger allgemenger Anästhesie net kënnen en Charge geholl ginn.

7. Am Fall wou et keng explizit gesetzlech Basis am Code de la sécurité sociale gëtt, erkennt d'Madame Ministesch dann d'Existenz vun enger normativer Lück un, déi entweder eng Upassung vun der Nomenklatur oder d'Aféierung vun engem derogatoresche Mechanismus verlaangt, deen eng Fall-zu-Fall-Evaluatioun erméiglecht, fir dat effektivt Recht op Soinen ze garantéieren? Am affirmative Fall: a wéi eng konkrete Fristen ass eng esou Upassung oder esou e Mechanismus virgesinn? Am negative Fall: op wéi eng präzisen juristeschen Grënn stäipt d'Madame Ministesch d'Meenung, datt weder eng Upassung nach en derogatoresche Mechanismus néideg wier, trotz de konkrete Konsequenze fir bestëmmte Patienten, déi bei der CNS verséichert sinn?

D'Diskussiounen betreffend Ännerunge vun der Nomenclature sinn am Gaangen. E präzisen Zäitraum wéini des Ännerungen eventuell kennen ëmgesat ginn, ka momentan net ofgeschat ginn.

Lëtzebuerg, den 12. Februar 2026

D'Ministesch fir Gesondheet
a sozial Sécherheet

(s.) Martine Deprez